

# Sorumutuk Konsellu Ministrus nian iha loron 24 fulan-marsu tinan 2021

## Prezidénsia Konsellu Ministrus

VIII Governu Konstitusionál

### Komunikadu Imprensa

#### Sorumutuk Konsellu Ministrus nian iha loron 24 fulan-marsu tinan 2021

Konsellu Ministrus hala'o sorumutuk iha Ministériu Finansas, iha Dili, no, hahú sorumutuk ho análise ba **aprezentasaun husi koordenadór Sentru Integradu Jestaun Krize (SIJK)**, kona-ba pontu situasaun epidemiolójika iha Timor-Leste. Daudaun ne'e rejista kazu esporádiku iha Oekuse no Covalima, propagasaun kazu iha Baukau, Vikeke no Lospalos ho orijen iha ema sira ne'ebé mai iha Dili, molok impozisaun serka sanitária, no propagasaun maka'as liuhusi SARS-CoV-2 iha área oin-oin sidade Dili nian.

Responsavel sira sala situasaun SIJK nian apresenta hanesan prioridade imediata hodi para ho foku sira transmisaun nian ne'ebé eziste, liuhusi detesaun lais ida no izolamentu husi kazu pozitivu hotu-hotu. Ne'e hakarak mós hodi aumenta kapasidade análise laboratoriál no rastreiu kontaktu nian sira. Ne'e mós hanesan prioritáriu hodi prevene transmisaun virus ba munisípiu sira seluk no atu prepara asaun sira mitigasaun nian ne'ebé presiza ba posivel foku transmisaun komunitária ne'ebé bele iha. Objetivu prioritáriu sira seluk maka mitigasaun kona-ba efeitu sosiú ekonómiku sira COVID-19 nian.

Haree ba evolusaun situasaun epidemiolójika iha Postu Administrativu Fatumea, munisípiu Kovalima, Konsellu Ministrus aprova ona projeto Rezolusaun Governu ne'ebé **revoga Rezolusaun Governu nu. 13/2021, loron 10 fulan-marsu, ne'ebé impoin Serka Sanitária iha Postu Administrativu Fatumea**.

Governu delibera ona atu propoin ba Sua Exelénsia, Señór Prezidente Repúblika, Francisco Guterres Lú Olo, **renovasaun estadu emerjénsia nian, ba loron tolunulu tan**. Haree ba mudansa preokupante husi situasaun epidemiolójika no proliferaun ba kazu sira ne'ebé mak rejista ona husi kontájiu COVID-19 nian, tantu iha nível rejionál, no mós iha nível mundiál, no atu evita no neutraliza risku sira husi propagasaun SARS-CoV-2, atu nune'e bele proteje saúde pública no iha kbiit atu hatán ba Sistema Nasional Saúde nian, Governu propoin ba Señór Prezidente Repúblika katak, ho renovasaun estadu emerjénsia nian ne'e, permite atu suspende ka limita direitu no garantia fundamentál balun.

Ikusliu, Konsellu Ministrus aprova mós projeto Proposta Lei ba **alterasaun dahuluk ba lei nu. 14/2020, loron 29 fulan-dezembru, ne'ebé aprova Orsamentu Jerál Estadu ba tinan 2021 (OJE 2021)**, sei apresenta ba Parlamentu Nasional ho pedidu prioridade no urjénsia, hodi fó resposta ba situasaun epidemiológica COVID-19 nian no ba ninia efeitu ekonómiku no sosiál sira.

Ho alterasaun ida ne'e, reseita konsolida  Setór Públiku Administrativu nian sa'e ba millaun dolar amerikanu 2.165,1<sup>1</sup> no reseita sira órgau  no servisu Administrasaun Sentrál nian sa'e ba millaun dolar amerikanu 1.932,5. Orsamentu Rejiaun Administriral Espesiál Oekuse Ambeno no Seguransa Sosiál la sei afetadu.

Alterasaun ne'e atu finansia konjuntu ida husi medida prinsipál neen intervensaun nian katak Governu prepara ona, ne'ebé hanesan: 1) apoiu ba empregu; 2) moratória kréditu nian; 3) izensaun propinas; 4) akizisaun alimentu; 5) apoiu ba profisionál liña oin sira; no 6) medida prevensaun no mitigasaun COVID-19.

Iha ámbitu medida apoiu ba empregu, prevee atribuisaun subsídu estraordinariu ida, ho período fulan tolu, hahú husi fulan-marsu to'o fulan-maiu tinan 2021, ba traballadór sira ne'ebé serbisu ba ema seluk ho montante ekivalente ho 70% husi saláriu ba setór sira atividade nian ne'ebé legalmente iha impedimentu hodi halo operasaun no 50% husi remunerasaun ba setór sira ne'ebé halo hela operasaun hanesan baibain. Entidade empregadór no traballadór sira sei dispensa husi dever pagamento kontribuisaun sosiál relativa ho rendimentu ne'e.

Ba traballadór independente sira, ba emprezáriu individuál sira, ba traballadór sira servisu doméstiku nian no ba jerente no administradór sira, prevee mós atribuisaun subsídu estraordináriu ida, hanesan ba período fulan-tolu, ekivalente ho 85% husi valór remunerasaun konvensionál. Sira mós sei dispensa husi dever pagamento kontribuisaun sosiál relativa ba rendimentu ne'e. Ne'ebé inklui mós medida ne'e hanesan traballadór sira ne'ebé hala'o atividade informál, durante sira halo ba ninia formalizasaun hamutuk ho Instituto Nasional Seguransa Nasional.

Prevee mós subsídu estraordináriu dezempregu nian ba traballadór inskritu sira no ho kontribuisaun realiza ona ba seguransa Sosiál, ho montante 40% husi valór remunerasaun konvensionál relativa ho eskalau da-1 ne'ebé hanesan baze insidénsia kontributiva ba seguransa sosiál iha adezaun fakultativa,

Ba traballadór independente sira, ba emprezáriu individuál sira, ba traballadór sira servisu doméstiku nian no ba jerente no administradór sira, prevee dispensa husi dever pagamento kontribuisaun sosiál no atribuisaun subsídu estraordináriu ba kompartisipasaun kona-ba kustu energia no renda sira.

Ne'e atu hamenus/alivia kustu ho amortizasaun empréstimu ba devedór sira, ho implementasaun moratória nian iha kumprimentu obrigasaun sira ne'ebé mosu husi kontratu konsesaun kreditu nian, liuhusi adiamentu durante fulan sia husi vensimentu obrigasaun nian siraatu entrega filafali kapitál, no liuhusi kompartisipasaun Estadu nian iha pagamento osan-funan nian.

Propoin mós, atu fó subsidiu ba pagamento propinas ba estudante ensinu superór sira, ne'eb'e labele hala'o ensinu prezensiál, to'o dolar amerikanu 150.

Prevee akizasaun ai-han husi produtór nasional sira husi Sentru Lojística Nasional ba distribuisaun husi ema no família sira ne'ebé presiza liu.

Parte husi reforsu OJE 2021 sei utiliza mós hodi finansia medida prevensaun no mitigasaun COVID-19, liuliu relasiona ho implementasaun programa vasinasaun no akizisaun materiál barak tan ba teste sira no tratamentu kona-ba moras internadu sira, no mós, konstrusaun fatin izolamentu no kuarentena foun no aumentu kapasidade fatin sira ne'ebé eziste ona.

Sei prevee mos iha Proposta Lei nee osan ba apoiu ba profisionál liña oin, ba atividade SIJK, ba Programa Sesta Bázika no ba reforsu estok foos iha Sentru Lojístico Nasional.

Medida sira ne'e eziye reforsu ida Orsamentu Jerál Estadu nian, ne'ebé konsentra iha aumentu dotasaun husi Fundu COVID-19. Aumentu ne'ebé prevee ona iha despeza akontese tanba inskrisiaun saldu jerénsia, ne'ebé apuradu iha ezersísiu

tinan 2020 nia rohan, maibé ne'ebé la inskreve iha OJE 2021, no mós iha realokasaun dotasaun orsamentál sira entre servisu sira hahú husi Dotasaun ba Governu tomak no fundu Infraestrutura sira, la presiza atu hasa'e montante transferénsia nian husi Fundu Petrolíferu ba OJE. **REMATA**

url: <http://timor-leste.gov.tl?lang=tp&p=27350>